

11/1
03-3
Pabls.

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, broj: 17/00, 1/05, 11/06, 13/11 i 15/17), a u vezi sa članom 69. tačka 44. i članom 81. stav (2) Zakona o izvršenju budžeta Tuzlanskog kantona za 2021. godinu („Službene novine Tuzlanskog kantona“ broj: 1/21), Vlada Tuzlanskog kantona na sjednici održanoj dana 27.04.2021. godine, d o n o s i

O D L U K U

o utvrđivanju kriterija, uslova i postupka za raspodjelu sredstava sa potrošačke jedinice 32010003 – Manifestacije kulture od interesa za Tuzlanski kanton

Član 1.

- (1) Ovom odlukom utvrđuju se uslovi, kriteriji i postupak raspodjele sredstava sa potrošačke jedinice 32010003 - Manifestacije kulture od interesa za Tuzlanski kanton.

Član 2.

Raspodjela sredstava vršiće se u skladu sa raspoloživim sredstvima Budžeta Tuzlanskog kantona za 2021. godinu („Službene novine Tuzlanskog kantona“, broj: 1/21) i Zakonom o izvršenju Budžeta Tuzlanskog kantona za 2021. godinu („Službene novine Tuzlanskog kantona“, broj: 1/21) u ukupnom iznosu od 150.000,00 (slovima: stotinupedesethiljada) KM i to za:

- a) sufinansiranje programa/projekata manifestacija kulture u iznosu od 115.000,00 (slovima: stotinupetnaesthiljada) KM,
- b) sufinansiranje programa/projekata izdavačke djelatnosti u iznosu od 20.000,00 (slovima: dvadesethiljada) KM i
- c) sufinansiranje realizacije manifestacije „Dani evropskog naslijeđa“ u iznosu od 15.000,00 (slovima: petnaesthiljada) KM.

Član 3.

- (1) Sredstva iz člana 2. tačka a) ove odluke će biti dodijeljena:
- a) ustanovama i udruženjima u iznosu od 110.000,00 KM sa ekonomskog koda 614300 – Tekući transferi neprofitnim organizacijama i
 - b) privrednim društvima u iznosu od 5.000,00 KM sa ekonomskog koda 614500 – Subvencije privatnim preduzećima i poduzetnicima.
- (2) Sredstva iz člana 2. tačka b) ove odluke će biti dodijeljena:
- a) ustanovama i udruženjima u iznosu od 5.000,00 KM sa ekonomskog koda 614300 – Tekući transferi neprofitnim organizacijama,
 - b) privrednim društvima u iznosu od 5.000,00 KM sa ekonomskog koda 614500 – Subvencije privatnim preduzećima i poduzetnicima i
 - c) fizičkim licima u iznosu od 10.000,00 KM sa ekonomskog koda 614200 – Tekući transferi pojedincima.
- (3) Sredstva iz člana 2. tačka c) ove odluke dodjeljuju se sa ekonomskog koda 613900 - Ugovorene i druge posebne usluge, u iznosu od 15.000,00 KM i to dobavljačima koji će pružati ugovorene i druge posebne usluge u postupcima javnih nabavki koje provodi Ministarstvo za kulturu, sport i mlade Tuzlanskog kantona (u daljem tekstu: Ministarstvo).

Član 4.

- (1) Sredstvima iz člana 2. tačka a) ove odluke vršiće se sufinansiranje pojedinačnih programa/projekata pravnih lica koja organizuju tradicionalne i druge značajne pozorišne, književne, muzičko-scenske, muzičke, plesne, muzejske, arhivske, bibliotečke, likovne, izložbene

i filmske manifestacije, tribine, simpozije i programe, kao i manifestacije, tribine, simpozije i programe usmjerene na promociju i očuvanje kulturne baštine, ukoliko podnosioci zahtjeva ispunjavaju sljedeće uslove:

- a) imaju sjedište u Tuzlanskom kantonu,
 - b) da su registrovani za obavljanje kulturnih djelatnosti najmanje godinu dana skladu sa zakonom,
 - c) da su izmirili obaveze po osnovu poreza i doprinosa,
 - d) da za predloženi program/projekat nisu dobili sredstva sa drugih budžetskih pozicija Budžeta Tuzlanskog kantona u 2021. godini i
 - e) da se predloženi program/projekat realizuje u 2021. godini.
- (2) Zahtjevi pravnih lica za sredstva iz člana 2. tačka a) ove odluke kojima su dodijeljena sredstva u 2018., 2019. i 2020. godini, a koji nisu dostavili narativni i finansijski izvještaj o namjenskom utrošku dodijeljenih sredstava i koji nisu opravdali dodijeljena sredstva, biće odbačeni i neće se uzeti u razmatranje.
- (3) Zbog ograničenog iznosa sredstava, podnosilac zahtjeva za sredstva iz člana 2. tačka a) ove odluke može predložiti jedan program/projekat za manifestacije kulture od interesa za Tuzlanski kanton, za koji se može dodijeliti maksimalno do 7.000,00 KM.
- (4) Sredstvima iz člana 2. tačka b) ove odluke vršiće se sufinansiranje pojedinačnih programa/projekata izdavačke djelatnosti pravnih i fizičkih lica ukoliko podnosioci zahtjeva ispunjavaju sljedeće uslove:
- a) da su izdavač ili autor sa područja Tuzlanskog kantona,
 - b) da su časopis, knjiga ili druga publikacija iz oblasti kulture, uz predočene najmanje dvije stručne recenzije,
 - c) da su izmirili obaveze po osnovu poreza i doprinosa (odnosi se samo na pravna lica),
 - d) da su autori programa/projekta izdavačke djelatnosti za koji podnose zahtjev (odnosi se samo na fizička lica) i
 - e) da se predloženi program/projekat realizuje u 2021. godini.
- (5) Zahtjevi pravnih lica za sredstva iz člana 2. tačka b) ove odluke kojima su dodijeljena sredstva u 2020. godini, a koji nisu dostavili narativni i finansijski izvještaj o namjenskom utrošku dodijeljenih sredstava i koji nisu opravdali dodijeljena sredstva, biće odbačeni i neće se uzeti u razmatranje.
- (6) Zbog ograničenog iznosa sredstava, podnosilac zahtjeva za sredstva iz člana 2. tačka b) ove odluke može ostvariti pravo na maksimalno do 2.000,00 KM po programu/projektu izdavačke djelatnosti.
- (7) Sredstvima iz člana 2. tačka c) ove odluke vršiće se sufinansiranje realizacije manifestacije „Dani evropskog naslijeđa“, a kroz organizaciju stručnih i naučnih skupova, okruglih stolova, konferencija, izložbi i drugih događaja vezanih za kulturnu baštinu.
- (8) Manifestaciju iz stava (7) ovog člana realizovat će Ministarstvo uz učešće javnih ustanova i javnog preduzeća iz resorne nadležnosti, kao i ostalih pravnih i fizičkih lica koja imaju kapacitete da svojim aktivnostima doprinesu uspješnoj organizaciji i prepoznatljivosti navedene manifestacije.

Član 5.

- (1) Finansijski se neće podržati programi/projekti iz člana 4. stav (1) ove odluke:
1. koji su zasnovani isključivo na ostvarivanju vjerskih ciljeva,
 2. koji su bazirani na promociji aktivnosti političkih stranaka,
 3. podnosilaca zahtjeva sa sjedištem izvan Tuzlanskog kantona,
 4. kojima se podrazumijeva finansiranje plaća (bruto i neto lični dohodak) i osnovne djelatnosti,
 5. podnosilaca zahtjeva koji su budžetski korisnici i

6. kojima se podrazumijeva finansiranje adaptacije, rekonstrukcije, investiciono ulaganje u obnovu objekata, isključivo kupovina opreme i slično.

(2) Finansijski se neće podržati programi/projekti iz člana 4. stav (4) ove odluke:

1. koji su udžbenici i druga nastavna sredstva,
2. koji su projekti dnevne, sedmične i mjesečne štampe,
3. podnosioca zahtjeva koji su budžetski korisnici,
4. više od tri izdavačka programa/projekata jednog izdavača i
5. više od jednog programa/projekata istog autora po izdavaču.

Član 6.

(1) Programi/projekti, koje ispunjavaju uslove iz 4. stav (1) ove odluke se vrednuju na sljedeći način:

1. kvalitet programa i doprinos podizanju kulturnog nivou u kantonu,
2. kontinuiranost programa/projekta i njegova tradicijska osnova (projektne aktivnosti koje imaju dugoročan učinak i održivost),
3. adekvatna zastupljenost općina/gradova,
4. značaj projekata/programa za kulturni život zajednice i društva,
5. saradnja sa drugim sličnim organizacijama na domaćem i međunarodnom planu i
6. afirmisanje kulture Tuzlanskog kantona.

(2) Programi/projekti koji ispunjavaju uslove iz 4. stav (4) ove odluke se vrednuju na sljedeći način:

1. kvalitet izdavačkog programa/projekata,
2. doprinos programa/projekata promociji kulture i kulturnih vrijednosti u Tuzlanskom kantonu i
3. jačanje kulturnih kapaciteta/razvoj kulturnog kapitala.

Član 7.

(1) Prilikom raspodjele sredstava iz člana 2. tačka a) i b) ove odluke, ministar za kulturu, sport i mlade (u daljem tekstu: ministar) će imenovati stručnu komisiju koja vrši ocjenu i odabir programa/projekata (u daljem tekstu: Komisija), koja se sastoji od 5 članova imenovanih iz reda istaknutih stručnjaka iz oblasti kulture i zaposlenika Ministarstva.

(2) Komisija će utvrditi da li podnosioci zahtjeva ispunjavaju uslove iz članova 4. i 5. ove odluke, procijeniti kvalitet programa/projekta te predložiti iznos za sufinansiranje programa/projekta.

(3) Procjena kvalitete programa/projekta će biti izvršena u skladu sa kriterijima iz člana 6. ove odluke.

(4) Komisija dodjeljuje usaglašene bodove od 1-5 za svaki od kriterija pojedinačno, na sljedeći način: 1 – veoma loše; 2 - loše; 3 – odgovarajuće; 4 – dobro; 5 – veoma dobro.

(5) Ukupan broj bodova za program/projekat predstavlja zbir svih bodova dodijeljenih po svakom kriteriju.

Član 8.

Samo programi/projekti koji su ostvarili više od polovine maksimalnog ukupnog broja bodova će biti sufinansirani.

Član 9.

(1) Po okončanju postupka dodjele bodova Komisija dostavlja ministru Odluku o utvrđivanju prijedloga o odobravanju finansijskih sredstava, korisnicima, iznosima i namjeni finansijskih

sredstava za sufinansiranje programa/projekata manifestacija kulture i programa/projekata izdavačke djelatnosti.

- (2) Na osnovu odluke Komisije iz stava (1) ovog člana Ministar donosi Odluku o odobravanju finansijskih sredstava, korisnicima, iznosima i namjeni finansijskih sredstava za sufinansiranje programa/projekata manifestacija kulture i programa/projekata izdavačke djelatnosti, na koju daje saglasnost Vlada Tuzlanskog kantona.
- (3) Ministarstvo će sa korisnicima sredstava iz stava (2) ovog člana zaključiti ugovore kojima će se utvrditi međusobna prava i obaveze ugovornih strana.

Član 10.

Transparentnost postupka dodjele sredstava za sufinansiranje programa/projekata manifestacija kulture i programa/projekata izdavačke djelatnosti će se osigurati na način da će podnosioci zahtjeva biti informisani putem web stranice Vlade Tuzlanskog kantona www.vladatk.gov.ba i web stranice Ministarstva www.mksmtk.gov.ba.

Član 11.

(1) Podnosilac zahtjeva, je prilikom podnošenja zahtjeva za dodjelu sredstva iz člana 2. tačka a) ove odluke, obavezan dostaviti sljedeću dokumentaciju:

1. Obrazac I – Prijavni obrazac za programe/projekate manifestacije kulture,
2. Obrazac II - Prijedlog programa/projekta sa finansijskim planom programa/projekta kojim se aplicira, koji sadrži potpunu specifikaciju troškova i visinu sredstava koja se potražuje od Ministarstva,
3. rješenje o upisu u odgovarajući registar pravnih lica kod nadležnog organa sa svim izmjenama (ovjerena fotokopija),
4. uvjerenje o poreskoj registraciji (ovjerena fotokopija),
5. listu manifestacija kulture, realizovanih u 2020. godini, potpisanu od strane ovlaštenog lica i ovjerenu pečatom, dok podnosioci zahtjeva koji nisu realizovali niti jednu manifestaciju kulture u 2020. godini dostavljaju izjavu o navedenoj činjenici potpisanu od strane ovlaštenog lica i ovjerenu pečatom,
6. dokaz o izmirenim obavezama po osnovu obaveznih doprinosa (PIO/MIO, zdravstveno osiguranje, osiguranje od nezaposlenosti) i poreza na platu, odnosno poreza na dohodak, ne starije od tri mjeseca od dana podnošenja zahtjeva i
7. potvrdu od banke o broju otvorenog transakcijskog računa, ne starija od tri mjeseca, u kojoj je jasno naznačeno da račun podnosica zahtjeva nije blokiran.

(2) Podnosilac zahtjeva - pravno lice je prilikom podnošenja zahtjeva za dodjelu sredstva iz člana 2. tačka b) ove odluke, obavezno dostaviti sljedeću dokumentaciju:

1. Obrazac III – Prijavni obrazac za pravna lica za programe/projekte izdavaštva,
2. rješenje o upisu u odgovarajući registar pravnih lica kod nadležnog organa sa svim izmjenama (ovjerena fotokopija),
3. uvjerenje o poreskoj registraciji (ovjerena fotokopija),
4. finansijski plan predloženog izdavačkog programa/projekata, sa potpunom specifikacijom troškova i visinom sredstava koju potražuje od Ministarstva,
5. dokaz o izmirenim obavezama po osnovu obaveznih doprinosa (PIO/MIO, zdravstveno osiguranje, osiguranje od nezaposlenosti) i poreza na platu, odnosno poreza na dohodak, ne starije od tri mjeseca od dana podnošenja zahtjeva,
6. izjavu o publikacijama izdatim u 2020. godini, ovjerenu kod nadležnog gradskog/općinskog organa ili notara, dok podnosioci zahtjeva koji nisu izdali niti jednu publikaciju u 2020. godini dostavljaju izjavu o navedenoj činjenici ovjerenu kod nadležnog gradskog/općinskog organa ili notara,

7. potvrdu ili drugi dokaz izdat od strane Javne ustanove Narodna i univerzitetska biblioteka „Derviš Sušić“ Tuzla (Biblioteke kantona), nacionalne i univerzitetske biblioteke Bosne i Hercegovine ili javne biblioteke na svom općinskom području (original ili ovjerena kopija) o tome da je, u skladu sa članom 9. Zakona o izdavačkoj djelatnosti („Službene novine Tuzlanskog kantona“ broj: 3/02) izvršena obaveza dostavljanja obaveznog broja primjeraka izdatih publikacija prema navedenim bibliotekama u 2020. godini (dostavljaju samo podnosioci zahtjeva koji su imali izdate publikacije u 2020. godini),
8. originalnu odluku izdavača ili drugi dokument kojim je utvrđena cijena jednog primjerka publikacije,
9. dvije stručne recenzije (sa originalnim potpisima recenzenata) i
10. potvrdu od banke o broju otvorenog transakcijskog računa, ne starija od tri mjeseca, u kojoj je jasno naznačeno da račun podnosica zahtjeva nije blokiran.

(3) Podnosilac zahtjeva - fizičko lice je prilikom podnošenja zahtjeva za dodjelu sredstva iz člana 2. tačka b) ove odluke, obavezno dostaviti sljedeću dokumentaciju:

1. Obrazac IV – Prijavni obrazac za fizička lica za programe/projekte izdavaštva,
2. CIPS obrazac PBA 3 (original ili ovjerena kopija) ili ovjerena kopija lične karte,
3. finansijski plan predloženog izdavačkog programa/projekata, sa potpunom specifikacijom troškova i visinom sredstava koju potražuje od Ministarstva,
4. Izjavu o publikacijama izdatim u 2020. godini, ovjerenu kod nadležnog gradskog/općinskog organa ili notara, dok podnosioci zahtjeva koji nisu izdali niti jednu publikaciju u 2020. godini dostavljaju izjavu o navedenoj činjenici ovjerenu kod nadležnog gradskog/općinskog organa ili notara,
5. potvrdu ili drugi dokaz izdat od strane Javne ustanove Narodna i univerzitetska biblioteka „Derviš Sušić“ Tuzla (Biblioteke kantona), nacionalne i univerzitetske biblioteke Bosne i Hercegovine ili javne biblioteke na svom općinskom području (original ili ovjerena kopija) o tome da je, u skladu sa članom 9. Zakona o izdavačkoj djelatnosti („Službene novine Tuzlanskog kantona“ broj: 3/02) izvršena obaveza dostavljanja obaveznog broja primjeraka izdatih publikacija prema navedenim bibliotekama u 2020. godini (dostavljaju samo podnosioci zahtjeva koji su imali izdate publikacije u 2020. godini),
6. izjavu ovjerenu kod nadležnog gradskog/općinskog organa ili notara o cijeni jednog primjerka publikacije, sa predračunom ili računom štamparije o visini naknade za štampanje publikacije, kao i drugim dokumentima iz kojih se može utvrditi cijena jednog primjerka publikacije (npr. ugovor sa lektorom, ugovor sa korektorom i sl.)
7. izjavu ovjerenu kod nadležnog gradskog/općinskog organa ili notara da je autor programa/projekta izdavačke djelatnosti za koji podnosi zahtjev,
8. dvije stručne recenzije (sa originalnim potpisima recenzenata) i
9. potvrdu od banke o broju otvorenog transakcijskog računa, ne starija od tri mjeseca, u kojoj je jasno naznačeno da račun podnosica zahtjeva nije blokiran.

(4) Sastavni dio ove odluke su Obrazac I – Prijavni obrazac za programe/projekate manifestacija kulture, Obrazac II - prijedlog programa/projekta sa finansijskim planom programa/projekta kojim se aplicira, Obrazac III – Prijavni obrazac za pravna lica za programe/projekte izdavaštva i Obrazac IV – Prijavni obrazac za fizička lica za programe/projekte izdavaštva, a isti se mogu preuzeti na web stranici Vlade Tuzlanskog kantona www.vladatk.kim.ba i Ministarstva mksmtk.gov.ba.

Član 12.

U slučaju nedostatka sredstava u Budžetu Tuzlanskog kantona za 2021. godinu, obustavlja se realizacija dodjele sredstava u potpunosti ili djelimično, srazmjerno nedostajućim sredstvima.

Član 13.

- (1) Korisnici odobrenih sredstava iz člana 9. stav (2) ove odluke dostavljaju Ministarstvu narativni i finansijski izvještaj o namjenskom utrošku sredstava na način i u rokovima koji će se definisati ugovorom iz člana 9. stav (3) ove odluke.
- (2) Korisnik koji ne postupi u skladu sa odredbom stava (1) ovog člana ne može ostvariti pravo na dodjelu sredstava za sufinansiranje programa/projekta za narednu godinu.

Član 14.

Odluka stupa na snagu danom donošenja i biće objavljena u “Službenim novinama Tuzlanskog kantona”.

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1-36-5952-1/21
Tuzla, 27.04.2021. godine

